

Kolosi

Nəgkiariien sə rani mə nəfe i nəkukuə

Kolosi in nəkukuə sə ro kahar i Pol rımərai nəpın in ramarə ia kalapus fwe Rom ia nəpın riti ipaka ti nuk 59 uə 60. Epafras revən fwe Rom mını pen ti Pol mə nahatən eikuə me nepwın fwe Kolosi kamhahatən nərmama mə nahatətəien səvənraha ia Kristo rıpkəmwhen mhə. Nahatən eikuə me nəha hamahatən irəha mə tuhəfwaki m nagelo me, mhesi pen natuakəmien me nepwın, mhəsiai mwi nəpın ikinan me nepwın. Pol rırai nəkukuə i revən ti nırəha mə tuhaməkeikei mhərər əknekın, mhəpwəh nətərigien ia nahatən eikuə me nəha. Kristo in rasori ia narimnari me pam. Nemhəien səvəi Kristo in əpa ruvehimıru kitaha ti noien ərəha me səkitaha. Iesu rıfi nari ia kitaha tsəpwəh mwi nisaiien natuakəmien me səvəi iərmama.

¹ *Iou Pol, iou aposol riti səvəi Iesu Kristo ti nəri nə mə Kumwesən rıməni nəkwan mə tako, mıne piəvtaha Timoti. ² *Nəkukuə i rauvehe tukumi-aha nərmama me səvəi Kumwesən fwe taon nəha Kolosi.

Kimiaha nə piəvmaha me hiəməuvehe mho ku-
atia kimiaha Kristo, hiamahatətə pərhiien irə.

Pwəh Kumwesən Tata səkitaha trəriari pehe na-
masanien mıne nəmərınuien m kimiaha.

Nəgnəginiien mıne nəfwakiien

* **1:1:** Efes 1:1 * **1:2:** Rom 1:7

³ Nəp̄in me pam, nəp̄in k̄imaha iahaməfwaki tukumiaha, iahaməni tanak ti Kumwesən i in Tata səvəi Iesu Kristo Iərimənu səkitaha. ⁴ Iahaməni tanak tukwe in ti nəri nə mə iahəuvəregi raka mə k̄imiaha hiamahatətə əknek̄in ia Iesu Kristo nənə mamhokeikei pik nərmama me səvəi Kumwesən. ⁵ Nahatətəien mine nokeikeien səkimiaha ro iam̄inhi irə ti nəri nə mə hiəukurən amasan ia rerimiaha mə Kumwesən truvei pehe nəfe nari sə r̄inəpnəpenə irə m k̄imiaha fwe ia neiai. Hiəuvəregi raka narimnari me nəha ia nəgkiariien pərhien, in i nəgkiariien amasan səvəi Iesu Kristo. ⁶ Ia kwopun me pam ia təkure t̄iprənə nərmama kamhəni irapw nəgkiariien amasan səvəi Kristo, nənə raukuə mamə kwənkwan mauverə mamə amasan n̄im̄iruien səvəi nərmama me həp̄ik. Rəmwhen a mw̄i ia k̄imiaha nəp̄in hiamregi mhəukurən n̄ipərhienien nəha ia namasanien səvəi Kumwesən, nənə rauverə mw̄i mukuə ia n̄im̄iruien səkimiaha. ⁷ Epafras r̄inahatən k̄imiaha ia nəgkiariien nəha. In iərmama riti səkimaha iahokeikei pik in, iahamo tukwini pəri nari k̄imaha min. K̄imaha iahəukurən nət̄igiteien irə, ramasitu ia wok səvəi Kristo maməgkiari tukwini səkimaha. ⁸ In r̄iməni pehe tukumaha i mə nokeikeien səkimiaha rasori raku pen ti Nən̄imw̄in Ikinan.

⁹*Ro iam̄inhi irə nəp̄in iahəregi nəvisaiuen nəha, nənə iahaməfwaki tukumiaha ia nəp̄in me pam, mamhəres mə k̄imiaha tihəuvehe mhəukurən amasan pam nəkwai Kumwesən ia nukurənien sə raku pen ti Nən̄imw̄in səvənhi. ¹⁰*Ro iam̄inhi irə

* **1:9:** Efes 1:9,16,17, Fil 1:9 * **1:10:** Fil 1:27, Efes 2:10

mine kímiaha tihamarə ia narəien atukwatukw sə ramo lərimənu səkitaha rerin ramagien, mamhəukuə kwənkwamiaha ia noien amasan me pam, nənə ia nəpın me nukurəniēn səkímiaha truvehē masori mwi hiəukurən amasan mwi Kumwesən. ¹¹ *Iahaməfwaki mə niskaiien asori səvəi Kumwesən tro kímiaha hiəskai nəpın nərahaiēn truvehē, pwəh hiərer əknekın ia nəpın me pam, nənə mho nətərigien səkímiaha rəpwəmwis, nənə mamho kímiaha hiamagien ¹² *mamhəni tanak ti Tata Kumwesən ti nəri nə mə in rino kímiaha mə hiəukurən nuvehē pəriēn nautə kímiaha nərmama ikinan me səvənhi. In rinəmri karen nautə nəha ia kwopun rukuraan ikin. ¹³ *Iakani iamınhi irə ti nəri nə mə in ripekı raka kitaha ia niskaiien səvəi nəpitəvien, mipekı pen kitaha ia nitətə sə Tini keikei ramərimənu irə. ¹⁴ *Tini rifi nari ia kitaha, mo mə Kumwesən trəpwəh nərpwinien noien ərəha me səkitaha.

Kristo in rasori ia narimnari me pam

¹⁵ *Tini Kumwesən in rəmwhen atukwatukw ia Tata səvənhi sə səpkətoni mhə. In nəmritaik sə in rasori ia neiai mine tıprənə mine narimnari me pam. ¹⁶ *In rasori ti nəri nə mə in rino pam narimnari me nəha, narimnari me səməme samətoni mine səməme səpkətoni mhə, kig me, uə ieni mə, uə nənimwin me səməme kamhəuvehi nasoriēn mine nərimənuiēn. Narimnari me pam nəha, Tini Kumwesən rino irəha mə səvənhi. ¹⁷ *In riməkupwən marə ia narimnari me pam,

* **1:11:** Efes 1:19, 3:16 * **1:12:** Efes 1:11,18 * **1:13:** Luk

22:53, Efes 2:2 * **1:14:** Efes 1:6,7 * **1:15:** 2Kor 4:4, Jon 1:18

* **1:16:** Jon 1:3,10 * **1:17:** Jon 1:1, 8:58

nənə narimnari me pam kamharə ti nəri nə mə niskaiien səvənhi raməkwtəmhiri irəha. ¹⁸ *In rasori ia nakalasia me səvənhi irəha həmwhen ia nipwran in kənkəpwə. In nukunen, iərmama sə riməkupwən mətui mwi ia nemhəien səvənhi, ro pen in ramasan ia narimnari me pam mukupwən.

¹⁹ *Kumwesən ramarə pam ia reri Tini mukuər irə. Nənə Kumwesən rerin ragien pwəh ro iamihhi irə. ²⁰ *Rerin ragien ripekhi narimnari me pam ia təkure tiprənə mine ia neiai hənəvisə irəha min, muvi simwın pehe irəha ia tini, nənə məmri nəməriniuen ia niten sə rinaiu ia nei kamarkuau.

²¹ *Fwe kupwən kimiaha hiamarə isipwın ti Kumwesən. Hiaməmwəki in ti nəri nə mə rerimiaha ramrhi ərəha in, nənə mamho noien ərəha me. ²² *Mətə təkwtəkwwuni, ti nəri nə mə Tini ruvehe iərmama məmwhen ia kitaha, memhə, ro pen Kumwesən ro kimiaha hiəuvehe in me nepwın. In ro iamihhi irə mə trərpwi irapw kimiaha ia nənimen hiatukwatukw pam,^a mhəmher, kəpwəh nətoniien noien ərəha riti səkimiaha. ²³ *Mətə tihaməkeikei mhəmwur pen ia nahatətəien səkimiaha, mamhərer əknekın irə, mhəpwəh nikiukiuien, mhəpwəh narakaiien ia noien sə hiaməmri pen əknekın nətərigien səkimiaha ia nəgkiariien amasan nəha hiəuvəregi raka mine nəfe rani. Kinəvisau irapw raka nəgkiariien amasan nəha ia kwopun me ia tiprənə.

* **1:18:** Efes 1:22-23, Wok Me 26:23, Rev 1:5 * **1:19:** Jon 1:16,

Kol 2:9 * **1:20:** Efes 1:10, 2:16, Rom 5:1, Efes 1:7, 2:13, 1Jon 2:2

* **1:21:** Rom 5:10, Efes 2:12, 4:18 * **1:22:** Efes 2:14-16, Efes 5:27

^a **1:22:** Uə “kimiaha nəkur ikinan me səvənhi.” * **1:23:** Efes 3:17, Hip 3:14, Mak 16:15, 1Tim 3:16

Iou Pol, iou iərmama riti sə iakamasitu ia wok nəha.

Pol ramasitu mamsese ti nakalasia me səvəi Iesu Kristo

24 *Təkwtəkwuni rerik ragien a mə kamo nəmisəien miou tukumiaha.^b Ia nəmisəien me i iakamregi ia nīpwrak, iakamrīpīn pen a mamo sampam ia nəmisəien me səvəi Kristo səməme in rīməregi ti nīpwrān. Nīpwrān nə in nə nakalasia me səvənhī. 25 *Iou iərmama riti sə iakamasitu ia nakalasia me nəha. Kumwesən rīnəmri pehe wok i ia rəgik mə takasitu ia kīmiaha, məvisau irapw pam nəgkiariien səvənhī m kīmiaha. 26 *Nəgkiariien nəha in nəgkiariien riti səvəi Kumwesən rīnərkwafə ti nərmama fwe kupwən, mətə təkwtəkwuni nəha Kumwesən rīno pui m nərmama me səvənhī. 27 *Kumwesən rokeikei mə tro nərmama me nəha səvənhī hətoni mhəukurən mə nəgkiariien nəha in rīnərkwafə i truvei pen nautə amasan m nərmama rīpko mhə irəha nəkur Isrel. Nautə amasan nəha Kristo ia rērīmiaha, iəmə sə hiamətīgite irə truvei pehe nasoriien m kīmiaha ia neiai.

28 *Kristo nəha, kīmaha iahaməni irapw in, mamhəvəhag m nərmama me pam, mamhahatən nərmama me pam ia nukurənien me pam, mə irəha pam tuhəuvehe mhəmruə ia noien səvəi Kristo, nənə iahərpwi irapw irəha ia nəmri

* **1:24:** Efes 3:13 **b 1:24:** Pol raməmak fwe ia kalapus nəpīn rīrai nəkukua i. Kalapus nəha in nəha nəmisəien sə Pol raməgkiari irə ia vas 24. * **1:25:** Efes 3:2,7-8 * **1:26:** Rom 16:25-26, Efes 3:3-5,9-10 * **1:27:** Efes 1:18, 1Tim 1:1 * **1:28:** Efes 4:13

Kumwesən. ²⁹ *Ia noien nəha iakaməmwur mamsese tukwe mamesi pen niskaiien asori səvəi Kristo sə ramo wok ia nimiruien səiou.

2

¹ Iakokeikei mə tihəukurən mə iou iakamsese pik tukumiaha nəkur Kolosi, mine nəkur Lao-tisia, mine nakalasia me pam səməme həpkətoni raka mhə nənimek ia nəpın riti. ² *Iakokeikei mə takasitu ia nirəha pwəh həregi ramasan fwe ia rerınraha, mhəuvehe mho kuatia mhokeikei irəha me, mhəukurən amasan nıpwrari nəgkiariien pərhiēn nənə mhəuvehi namasanien me pam səvəi noien i. Rə iamınhi irə irəha tuhəukurən nıpwrari nəgkiariien sə Kumwesən rınərkwafə i fwe kupwən. Nəgkiariien nəha in Kristo, ³ *iamə sə Kumwesən rınərkwafə pen nukurənien amasan me pam səvənhi irə. ⁴ *Iakaməgkiari iamınhi irə m kımiaha ti nəsisəgien ia nəgkiariien eikuə me səvəi nərmama sə rəsien mavi raka nətərigien səkimiaha. ⁵ *Nıpərhiēnien, nıpwrak rıpkarə mhə kımiaha min, mətə iakamarə kitaha m kımiaha ia nənımwik. Nənə rerik ragien pik ti nəri nə mə iakamətoni mə nətərigien səkimiaha kuatia a, nənə hiamahatətə əknekin ia Kristo.

Nərmama me səvəi Kristo nimiruien səvənraha ruyəuvehe muvəukuər raka

⁶ Ti nəri nə mə kımiaha hiəməuvehi Iesu Kristo mə in Iərimənu səkimiaha, nənə tihaməkeikei mharə ia narəien kuatia kımiaha

* **1:29:** Efes 3:7,20, Fil 4:13 * **2:2:** Efes 3:4,18, Kol 1:26 * **2:3:** Aes 45:3, 1Kor 1:24,30, Efes 3:19 * **2:4:** Rom 16:18, Efes 5:6, Kol 2:8 * **2:5:** 1Kor 5:3

min. ⁷ *Tihəkwtəmhiri əknekin in rəmwhen ia nuai nei raməkwtəmhiri əknekin tīprənə. Nimiruien səkimiaha traməkeikei mərer əknekin irə rəmwhen ia nimwə sə ramərer əknekin ia tīprənə. Nahatətəien səkimiaha traməkeikei miskai ia nəp̄in me pam rəmwhen kinahatən raka kimiaha irə. Nənə ia nəp̄in me pam tihaməkeikei mhəni tanak m Kumwesən.

⁸ *Nərmama nepw̄in nəha irəha kamhəni mə hokeikei pik nukurəni. Mətə nəgkiariien səvənraha ro neikuəien i, nīpwran riwən, ti nəri nə mə ramesi pen a nahatəni səvəi nərmama mine nənimw̄in me i irəha nukune noien me səvəi tīprənə i. Nəgkiariien səvənraha rīpkesi pen mhə nəvisauien ia Kristo. Tihamətui amasan mə nərmama me nəha tuhəpwəh nərkwiien kimiaha ia nəgkiariien me səvənraha.

⁹ *Iakani iam̄inhi irə ti nəri nə mə iərmama nəha Kristo, Kumwesən ramarə pam ia nīpwran mukuər irə. ¹⁰ *Nənə ti nəri nə mə kimiaha hiəməuvehe mho kuatia kimiaha min nimiruien səkimiaha ruvəkuər raka nari riti mwi riwən tihaməkeikei mhətui. Kristo in rasori ia nənimw̄in me pam səməme kamhəvehi nasoriien mine nərimənuien. ¹¹ *Nənə ti nəri nə mə hiəməuvehe mho kuatia kimiaha min, kuvəvehi raka ninhum m kimiaha. Mətə nuvehien ninhum nəha iakani rīpko mhə sə nəha iərmama riti ro ia rəgin, rekəm. Iakani nuvehien ninhum nəha Kristo rino mərai raka noien ərəha səvəi nīpwramiaha. ¹² *Nənə nəp̄in kino paptas ia kimiaha, kinimwi kimiaha

* **2:7:** Efes 3:17, Efes 2:20-22 * **2:8:** Kol 2:3 * **2:9:** Jon 1:14,16 * **2:10:** Efes 1:21-22 * **2:11:** Rom 2:29 * **2:12:** Rom 6:4, Efes 1:19-20, Kol 3:1

kímiaha min. Ia paptaes naha kíməuvehi utə mwi kímiaha hiətui mwi ia nemhəien kímiaha min, ti nəri nə mə hiamahatətə ia niskaiien səvəi Kumwesən. Ia niskaiien naha in rino Kristo rətui mwi ia nemhəien səvənhi.

Ia nei kamarkuau i Kumwesən rifi nari ia nərmama me səvənhi

¹³* Kímiaha nərmama rípko mhə kímiaha nəkur Isrel kəpwəh nuvehien ninhum m kímiaha ia nípwrámiaha, fwe kupwən rəmwhen mə hiəuvamhə raka ti nəri nə mə hiənamo noien ərəha me, mətə Kumwesən ruvei pehe nímíruien vi m kímiaha nəpín rino Kristo rətui mwi ia nemhəien səvənhi. In rinenouenou raka noien ərəha me pam səkitaha. ¹⁴* Nəkukuə naha rərəha ia kitaha kímərai pen noien ərəha me irə səkitaha mə tukərpwín pehe m kitaha, Kumwesən ruvəuvehi raka raka nəkukuə naha irau nəgkiariien me səvəi Loa səməme kamhərkwi kitaha, mərui tərini pen ia nei kamarkuau. Ro pen in rifi nari ia kitaha. ¹⁵* Ia nei kamarkuau Kumwesən rətəfi niskaiien səvəi nənimwín me səməme kamhəuvehi nasoriien mine nərimənuien. Rəmwhen mə rərihi tərini rəginraha, miri irapw irəha ia nəmri nərmama, mahatən pen mə ruvəuvehi irapw niskaiien səvənraha ia naruağəniien.

¹⁶* Ro pen tihəpwəh nəseniien iərmama riti rəkiri noien səkímiaha ia nıkaren səvəi nəfe hiamani uə hiamənimwi, uə ia nıkaren səvəi nəfe hiamo ia nəpín ikinan me, uə nəpín səvəi məkwə vi, uə sapat. ¹⁷* Narimnari me naha həmwhen a

* **2:13:** Efes 2:1,4-5 * **2:14:** Efes 2:14-16, 1Pit 2:24 * **2:15:**
Kol 1:13 * **2:16:** Rom 14:1-12 * **2:17:** Hip 8:5, 10:1

ia nənimwi nari sə rəpwəh ihi nier peheien, mətə nīpwran in Kristo. ¹⁸ Nərmama nepwīn nəha irəha kamhəni mə nərmama tuhaməkeikei mhəuvehi irapw nətərigien səvənraha nənə mhəfwaki m nagelo me. Irəha kamhəni nəgkiariien nəha mamhərer ia nəməkrəhaien me səvənraha səməme hənətoni. Kimiaha tihəpwəh nukurirəien irəha kamo hiarfai ia nəfe nari hiamaiu tukwe. Nərmama me nəha kamhəfiəutə ia nīrəha ti nəri nīpwran riwən, mamhəni nəfe ruku pen ti nətərigien atukw səvənraha. ¹⁹ *Irəha həpkəkwtəmhiri əknekīn mhə Kristo, mətə in rəmwhen ia kənkəpwə iərmama. Kitaha səmwhen ia nīpwrai iərmama nəha kwənəkwas me həkwi tərini kwopun nīkəkryn me rīrīpīn ikīn. Nəpīn Kristo raməkwməni kitaha nənə kitaha pam səuverə ia nuverəien sə ruku pen ti Kumwesən.

²⁰ Kimiaha hiəuvamhə raka kimiaha Kristo. Hiənaraka raka raka ia nənimwīn me i irəha nukune noien me səvəi tīprənə i. Mə ro iamīnhi irə rəfo kimiaha hiamarə ihi rəmwhen kimiaha nərmama me səvəi tīprənə? Rəfo kimiaha hiaməsiai natuakəmien me i kamhəni iamīnhi irə mə, ²¹ “Tikəpwəh nuvehien, məpwəh nəni əghanien, məpwəh nīrapiien”? ²² *Natuakəmien me nəha kamhəni nəvegīnien mīne narimnari me hiani uə hiəuvehi nənə triwən mwi. Kamhesi pen nətərigien mīne nahatənien səvəi iərmama. ²³ Nīpərhiēnien, rosi nərmama me nepwīn kamhətə mə natuakəmien me nəha ho nukurənien i ti nəri nə mə ikamesi pen maməmwur mə tikəfwaki skai m Kumwesən, mauvehi irapw

* **2:19:** Efes 2:21, Efes 4:15-16 * **2:22:** Aes 29:13, Mat 15:9

nətərigien səim, nīpwram raməmisə i. Mətə natuakəmien me nəha ko həpkasitu mhə mhəsisəg noien ərəha səvəi nīpwrataha.

3

Nərmama me səvəi Iesu Kristo tuhaməkeikei mharkahu ia nimiruien vi

¹ *Ti nəri nə mə Kumwesən rino kimiaha hiətui mwi ia nemhəien kimiaha Kristo, ro pen təkwtəkwuni nəha tihaməkeikei mhətui narimnari me fwe irənhə ia kwopun nəha Iesu raməkure ikin ia nikare Kumwesən mwatuk.

² *Nətərigien səkimiaha traməkeikei məmak ia narimnari me fwe irənhə, mətə trəpwəh nəmakien ia narimnari me ia təkure tīprənə

i. ³ *Iakani iamīnhi irə ti nəri nə mə kimiaha hiəuvamhə raka, nimiruien səkimiaha kinərkwafə pen ia Kumwesən kimiaha Kristo. ⁴ *Nimiruien pərhien səkitaha in nə Kristo. Nənə nəpīn Kristo trirərig pehe mwi, Kumwesən tro nərmama pam hətoni Kristo mine kitaha, nənə irəha tuhətoni namasanien mine niskaiien səvənhi.

⁵ Ro pen kimiaha tihaməkeikei mhəpwəh anan noien ərəha səvəi tīprənə me i: nīpran mine nəрман kamhəiri əpnəpen irəha me, irəha kamho noien ərəha sə ro a naurisien, mamhokeikei pīk irəha me ti noien ərəha, nətərigien səvənraha rukuər ia noien ərəha, rerinraha ramakres (noien nəha rəmwhen mə kamhəfwaki pen m nənimwi nari me). ⁶ Noien me nəha kamho niemaha raməpi Kumwesən. Triṗko mhə tui in ruvehe mərpwīn

* **3:1:** Kol 2:12, Mak 12:36, 16:19, Efes 1:20 * **3:2:** Mat 6:33

* **3:3:** Rom 6:2, 2Kor 5:14 * **3:4:** Fil 1:21, 1Kor 15:43, 1Jon 3:2

noien ərəha me səvəi nərmama me nəha səməme kamhərui nəkwən. ⁷ Fwe kupwən kimiaha mwi hiamarə mamho noien ərəha me nəha nəp̄in noien ərəha me nəha kamhərimənu ia kimiaha. ⁸ *Mətə təkwtəkwni nəha tihaməkeikei mharaka pam ia nirəha: niemaha, nətəpaharien, nəmwəkien iərmama, niniiien n̄ikare iərəmə, mine nəgkiariien əmkemik sə raku pen ia tərhui iərəmə. ⁹ *Tihəpwəh neikuəien ia kimiaha me, ti nəri nə mə hiənəpwəh raka n̄im̄iruien akuas səkimiaha mine noien ərəha me səvənhi, ¹⁰ *nənə mharkahu ia n̄im̄iruien vi. N̄im̄iruien vi nəha in nəha iərmama vi sə Kumwesən rino, mamərməvi ia nətərigien səvənhi mə truvehə məmwhen irə. ¹¹ *Ti nəri nə mə kitaha səuvəuvehə mhəno nərmama vi me ia kitaha nəri auər a mə ik iəmə Isrel uə r̄ipko mhə ik iəmə Isrel, kuvehi ninhum mik uə k̄ipkuvehi mhə ninhum mik, ikukurən amasan nari uə ipkukurən amasan mhə nari, ik slef uə r̄ipko mhə ik slef, mətə Kristo in narimnari me pam, mamarə ia reritaha pam.

¹² *Kimiaha nərmama Kumwesən r̄imər̄fi kimiaha. Kimiaha nərmama ikinan mine nərmama keikei me səvənhi. Ro iam̄inhi irə kimiaha tihaməkeikei mhəuvehi pen n̄im̄iruien vi nəha səkimiaha rəmwhen ia karkahu səkimiaha. Kimiaha tihaməkeikei mhəpi ti nərmama, mho ramasan m̄inraha, mhəuvehi irapw nətərigien səkimiaha, mhəpkəfiūtə mhə ia kimiaha, mho nətərigien səkimiaha rəpwəmwis, ¹³ *mhəpwəh nəseniien niemaha rəpi akwauakw kimiaha. Tr̄ini m̄inuə iərmama riti ro rərəha ia kimiaha riti

* **3:8:** Efes 4:25-31, 5:4 * **3:9:** Efes 4:22,25 * **3:10:** Efes 4:24

* **3:11:** Kal 3:28 * **3:12:** 1Tes 2:9, Efes 4:2,32 * **3:13:** Efes 4:32, 5:2

ramasan mə hienouenou i. İərimənu səkimiaha rinenouenou noien ərəha me səkimiaha. Ro pen kımiaha mwi tihaməkeikei mhenouenou noien ərəha me səkimiaha me. ¹⁴*Nənə irənhə ia noien me pam nəha, tiharkahu nokeikeien sə ravi tərini amasan narimnari me pam həuvehe mho kuatia.

¹⁵*Nənə pwəh nəmərınuien səvəi Kristo rərimənu ia rerımiaha, ti nəri nə mə Kumwesən rınəkwein ia kımiaha mə tihəuvehe mhousəsımwın rəmwhen nıpwrai iərmama kuatia mharə ia nəmərınuien nəha. Nənə ia nəpın me kımiaha tihaməkeikei mhəni tanak m Kumwesən.

¹⁶*Pwəh nəgkiariien səvəi Kristo ramarə pəpwıə ia rerımiaha, hiamahatən mamhəvəhag m kımiaha me ia nukurənien me pam. Tihani nıpu me ia nəkukuə nəha Ol Sam, mine nıpu me səvəi nəfwakiiien, mine nıpu me səməme kamhəuku pen ti Nənimwın İkinan, mhəgnəgini Kumwesən mə rerımiaha ragien tukwe. ¹⁷*Narimnari me pam səməme hiamo, mine nəgkiariien me pam səməme hiaməni, tihamo mamhəni ia nəghi İesu İərimənu səkitaha, mamhəni tanak m Tata Kumwesən tukwe.

Nəvəhagien revən ti nakalasia me ia nimwə me səvənrəha

¹⁸*Kımiaha nıpran me, tihaməkeikei mhəsiai nərman me səkimiaha. In nə noien atukwatukw nıpran me kamhahatətə ia İərimənu tuho.

* **3:14:** Rom 13:8-10, 1Kor 13:13, Efes 4:3 * **3:15:** Fil 4:7, 1Kor 12:13,27, Efes 4:4 * **3:16:** Efes 5:19 * **3:17:** 1Kor 10:31, Efes 5:20 * **3:18:** Efes 5:22

19 *Kìmiaha nərman me, tihaməkeikei mhokeikei nıpran me səkımiaha, mhəpwəh nometəien irəha.

20 *Kìmiaha nəkwərhakwərha me, tihaməkeikei mho nəkwai tata mine mama me səkımiaha ia narimnari me pam, ti nəri nə mə noien i ramo lərimənu səkitaha rerin ramagien.

21 *Kìmiaha tata me, tihəpwəh noien nəkwərhakwərha me səkımiaha niemaha rəpi irəha, kamo nətərigien səvənraha rimwei.

22 *Kìmiaha slef me, tihaməkeikei mho nəkwai nəmə asori me səkımiaha ia tıprənə i ia narimnari me pam, mətə tihəpwəh noien nəpın kamhətoni a kımiaha rəmwhen ia nərmama səməme kamhəmwur mə tuho nərmama rerinraha ragien, mətə tiho ia rerimiaha pam mhehekır lərimənu səkitaha. 23 Nəfe nəghin hiamo, tiho ia rerimiaha pam rəmwhen hiamo tukwini nari m lərimənu səkitaha, rıpkə mhə hiamo tukwini nari m nərmama. 24 Kımiaha hiəukurən mə lərimənu səkitaha truvei pehe nəəkuien atukwatukw səvəi narimnari me səməme hiamo. Nəəkuien nəha in rinəmri karen raka mə səvəi nərmama me səvənhi. lərimənu pərhiən sə hiamo tukwini nari min in nə Kristo. 25 *Mətə iərmama sə ramo rərəha truvehi atukwatukw mwi nəəkuien səvəi noien ərəha səvənhi, ti nəri nə mə Kumwesən ramo raməmnəmwhen m nərmama me pam.

4

1 *Kìmiaha nəmə asori me, tihaməkeikei

* 3:19: Efes 5:25 * 3:20: Efes 6:1 * 3:21: Efes 6:4 * 3:22: Efes 6:5-8 * 3:25: Rom 2:11 * 4:1: Lev 25:43,53, Efes 6:9

mho ratukwatukw m slef me sækimiahaha pwəh rəmnəmwhen a. Tiho iamihhi irə ti nəri nə mə hiəkukurən mə kīmiaha mwi hiamarə tegin iamə asori riti. Iəmə asori nəha in fwe ia neiai.

Nəvəhagien me nepwīn mwi

² *Kīmiaha tihaməkeikei mhəfwaki m Kumwesən ia nəpīn me. Nəpīn tihəfwaki irə, tihəpwəh napriien, mamhəni tanak m Kumwesən.

³ *Tihaməfwaki mwi tukumaha mə Kumwesən trəsevər ia təpinhə tukumaha pwəh iahəni irapw nəvisauien ia Kristo sə fwe kupwən ramərkwafə. Nəgkiariien i in i iakinani irapw nənə kuvehi puvnimwə iou ia kalapus tukwe.

⁴ *Tihəfwaki mə takini irapw nəgkiariien nəha trəmher amasan rəmwhen a mə takaməkeikei mo iamihhi irə.

⁵ *Kīmiaha tihaməkeikei mho nari ia nukurəniien ia nəmri nərmama iruə me mhəpwəh nətə wauien ia nəpīn riti sækimiahaha ti nuvi peheien irəha.

⁶ *Pwəh nəgkiariien sækimiahaha ramasan ia nəpīn me məsien rəmwhen ia nəvegīniien kuvei pen sol irə, nənə tihaməkeikei mhəkukurən amasan mə tihəfo irə mhəriipwen nəgkiariien səvənraha kuatia kuatia.

Nəgkiariien sampam

⁷ *Tikikas trəvisau irapw pam noien me səiou ia kwopun i m kīmiaha. In piəvtaha keikei riti sə kīmahaha iahəkukurən nətigiteien irə, ramasitu mamō tukwini nari m Iərimənu səkītaha kīmahaha min. ⁸ *Takərhi pehe in tukumiahaha ti noien i,

* **4:2:** Efes 6:18, Fil 4:6 * **4:3:** Rom 15:30, Efes 6:19, 1Kor 16:9

* **4:4:** Efes 6:20 * **4:5:** Efes 5:15-16, 1Tes 4:11-12 * **4:6:** Efes

4:29, 1Pit 3:15 * **4:7:** Efes 6:21 * **4:8:** Efes 6:22

mə in tro kɪmiaha hiəregi ramasan, mɪni irapw tukumiaha mə iahaməfarə irə. ⁹ *In truvehe irau Onesimas, piəvtaha keikei i kɪmaha iahəukurən nətigiteien irə, in iərmama riti səkɪmiaha. Irau trouəvisau narimnari me pam ia kwopun i m kɪmiaha.

¹⁰ *Aristakas in ramarə ia kalapus kɪmrau min, in rani ramasan tukumiaha. Mak, piəvi Panapas sə karen, in mwi rani ramasan tukumiaha. Mak nəha, kɪmaha iahəuvəni pehe raka tukumiaha i mə kɪmiaha tihaməkeikei mhəsevər ia rerimiahā tukwe trini minuə ruvehe tukumiaha. ¹¹ Nənə Josua Jastas in mwi rani ramasan tukumiaha. Ia kwənəkwus me səvəi nəkur Isrel səməme kamhəni nɪpərhiēnien ia Iesu, iəmənmirəhar i irəhar əpa kamharowok kɪmaha mɪnraha ia nɪkaren səvəi nɪtətə sə Kumwesən ramərimənu irə, nənə irəhar harnasitu pik ia nirak. ¹² Epafras, iərmama riti səkɪmiaha sə ramo tukwini nari m Iesu Kristo, in mwi rani ramasan tukumiaha. Ia nəpɪn me rerɪn ramrhi kɪmiaha ia nəfwakiiēn me səvənhi, maməres Kumwesən mə kɪmiaha tihərər əknekɪn mhəmruə nənə mhəukurən amasan narimnari me pam səməme Kumwesən rokeikei. ¹³ Iou iakəsēni mə nɪpərhiēnien in ramo wok skai tɪ nasituiēn ia kɪmiaha, mɪne nəkur Laotisia, mɪne nəkur Hierapolis. ¹⁴ Luk, tokta keikei səkɪtaha, mɪne Temas, irau krauni ramasan tukumiaha. ¹⁵ Tihəni tukwini ramasan səiου revən tɪ piəvtaha me fwe Laotisia, mɪne prən nəha Nimfa, mɪne nakalasia me səməme kamhousəsɪmwɪn irəha me ia nəkwai nɪmwə səvənhi.

¹⁶ Nəpɪn tihəvsini raka nəkukuə i səiου, nənə

* **4:9:** Flm 10-12 * **4:10:** Wok Me 19:29, 12:12, Wok Me 13:13, Flm 24

tihaməkeikei mhərhi pen i revən ti nəkur Laotisia mə irəha tuhəvsini mwi m nakalasia me fwe ikin. Ia noien a mwi nəha, kimiaha tihaməkeikei mhəvsini mwi nəkukuə səvəi nəkur Laotisia.

¹⁷ *Nənə tihaməkeikei mhəni pen ti Akipas mə in traməkeikei mo pam wok sə Iərimənu səkitaha riməuvei pen min.

¹⁸ *Iou Pol iakauvehi nəri kamrai nari irə mamrai a ia rəgik nəgkiariien səvəi niniien ramasan m kimiaha. Tihəpwəh nenouenouien jen me i kinərihi iou irə. Pwəh namasanien tramarə tukumiaha.

* **4:17:** Flm 2 * **4:18:** 1Kor 16:21

Nəkukuə Ikinan
The New Testament in the Nəfe (Kwamera) language
of Southeast Tanna, TAFEA Province, Vanuatu
Niutestamen long lanwis Nəfe blong Vanuatu.
Le Nouveau Testament dans la langue Nəfe de
Vanuatu.

copyright © 2013 Wycliffe Bible Translators, Inc.

Language: Nəfe (Nəfe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 11 Nov 2022 from source files dated 30 Nov 2021

26b0f540-c192-5878-be67-18ede9ab1416